



金陵集 二

詩

~ 16
2323
2



2323
12-2

金陵集卷之三目錄



詩

真泠園 御愛松歌

北京貿出普餌茶是日適入對受賜十飴

聞元履除官喜而有賦二首

秋夜

有人贈墨

景深充御史慰諭龍灣作一律以寄其行

九日友人寄示韻

除夜次士樹直中韻三首

夏日元生有鎮以檢書官來投刺憶余十五年
前與子定元履讀書山寺生亦萍逢於禪榻
之間同研做業別後不復相聞今者相見顏
貌依稀問其年則已近五十矣道舊念今不
覺流光之感書此以識

鄭學究翊周配孺人李氏生烈特異鄉黨諸人
呈狀禮部特命旌閭余嘗聞其事而感異
之今者其胤子銓來乞掄揚文字遂一篇
一首以識其節行後有修史者庶幾取而觀
之

以眼病辭官有吟

南至前二日夢與國器飲酒梅花樹下劇談疊
疊而罷覺來夜已五鼓矣

正月十五夜諸少年作踏橋遊事余以病不出
詠庭鶴

申判書應顯輓二首

尹相國著東輓

夢惟人

雨後偶吟一律示蓮社諸君

高校理宅謙舊與交識聞今年謝歸鹿門舊隱

和鄭解元幽字韻以歸之

文蓮社諸少年韻

霞溪曹君伯郁鼎彬至飲酒話舊

和柳檢書惠甫韻

徐學士準平出宰淳昌其行也不可無詩書此

以贈

冬夜與閔生君憲話舊

尤翁祠版影幘將向後孫欽書載寧任所路出

京師余至江上迎拜與韓叅判用龜徐汝中

魚士翼用謙沈稗教同坐幕次

江西太守趙國珍鎮球來別拈唐人韻以贈

鄭承旨澤字輓二首

正月上辛陪 享社壇恭和 聖製

三日遊駱山

春日梨花酒告熟內閣翰苑諸學士以詩譏余

置酒不解飲至此之美女得薄情郎仍乞一

壺戲步其韻以送之

內閣與景深稗教諸學士次柳檢書訓字韻

惠甫次沈學士稗教浚字韻寄示馳筆以復

哭芝湖樵夫

尚州金斯文

濟默

行著一鄉屢被道薦顧不偶

時老於布衣人皆惜之往年卜築于嶺南之

求道谷仍以名其室亦足知其老而好學窮

不忘道也今秋其胤子益耜以會心李丈

敏

輔求字韻乞余一言茲成小絕以副之景深

及金學士汝仁

近淳

皆和之

題景深家所藏泉漳逸民恩酌帖後二首

南至前二日孫老景輝適至夜與曹君伯郁共

賦

又贈孫君

篆經齋與松孫宗人良師

石老

丁生志學小集

賦得甘紅露

與松孫良師丁生夜集書船閣觀梅拈韻志懷

月夜與良師丁生對酌

夜坐拈牧隱韻

題李生扇畫畫是張漢宗墨蟹也

寄常山南使君士樹

雪中李學士性老

存秀

來訪

時御定三禮兩漢五子八家陸藁諸手圈成

書下七言十韻排律

教校正諸臣賡進應

命

祈雨楮子島與申檢討

綯

洪翰林

黃周

同舟性

老學士亦至

曉發斗尾

舟中見龍門山

余蒙 恩按節東藩之翌月值大碩人壽辰設

小酌于觀風閣仍作七律一篇以道感恩

識喜之私

書船閣偶吟一絕

昭陽亭吟示李知府

普天

自聞韶閣攜妓笛舟下昭陽

夜宿表訓禪院吟示高丞

鳴鶴

將尋靈源洞坐鳴淵石上偶吟

步至玉築臺令朴生吹簫三四弄痛飲至夕

靈源庵

噴雪潭

龜潭

真珠潭

內船潭

外船潭

坐香爐峯下俯見澄潭雲色漣漪可愛

萬瀑洞

同宗人伯高遊摩訶衍

歇惺樓

鴈門嶺

望毗盧峯

九日遊玉流洞

九龍淵歌

余自金剛歷登高城之四仙亭壁上有先君子
舊題感賦七絕三首刻揭下方

清澗亭效杜體

洛山寺觀日出

宿洛山寺東樓是夜海月明甚

鏡浦臺與趙承旨興鎮權正言駿具知縣縉宴

飲諸幕府皆會

踰大關嶺

宿清虛樓

次農翁韻題合江亭

登五臺山絕頂

正宗大王輓詞二十五首


金陵集卷之三

宜寧 南公轍 元平 著

詩

真泠園 御愛松歌

御愛松御愛松長慶橋邊南怡宮不知種松者誰子
五鬣巒岈欲化龍貞黠道人雅好事去年移家住駱
峯主人顛似元章石主人癡比子猷竹貞心堅節又
過之日夕盤桓爲愛惜甘柱穿散茯苓脉上有鶴棲
下龜伏圖譜所傳亦紛然三藏塔下正衙前畢宏韋
偃叫奇絕蕭王和賦何蜿蜒豈如此松樹鬱盤蔭百



步免教遊人礙笠中屨屐循欄屢止佳盍背合喚爓
雉客舉手平揖長臂國亦有怪人與怪物化翁聊與
恣戲劇幾回仙人葬海桑清風不斷十里香聞說鑾
輿昔暫駐 玉趾移晷爲彷徨扇仗玲瓏翳朝日袍
靴充錯納夏涼政如隆中龍臥時三顧若有風雲期
隋堤楊柳唐宮花韶華剝得一春支近日蒼官奇遭
遇千年壽獻南山巵况值有道天降祥甘露流液滋
靈芝六月不熱真冷園酒所排真賭野碁仙標亭亭
出塵表世間榮悴都不知書船自在波濤裏茶鼎時
聞笙簧吹倪高士唐餅元何由喚起九原寫此萬尺

枝松乎松乎吾將與爾歲寒期

北京賀出普餌茶是日適入對受賜十勛

衣袂天香動龍團剪彩箋和風消積雪冷節試新煙
爽味知青鳳奇文證玉蟬愧非調鼎手欲學煉丹仙
聞元履除官喜而有賦二首

冰鑑稱吏部除日得君先多送哦詩日今當筮仕年
妻兒爲莞爾牆屋改蕭然香炭支清俸爭如墾紙田
窮人拋百事虛擬樂吾天短髮生秋思空堂倚晝眠
循良稱漢吏追逐比童年傲骨支袍帶不堪久縛牽

秋夜

秋風一夕起天宇何崢嶸
啾啾蟋蟀苦淅淅鴻鴈征
高軒候明月如與故人期
玉盤飛素影金鏡掃畫眉
蒼涼水氣寒中含萬里思
一年逢好夜達士見明時
君子在一方覽茲意何如
歲月倏其逝修道莫虛徐
下堂攬清華聊以寄索居

有人贈墨

三昧油煙媿國工生蠅翻恐汗屏風
憶會羣王朝元日雙脊龍丸受賜同

景深克御史慰諭龍灣作一律以寄其行

繡衣拖滿御香薰供帳西門遠送君
花甌舊夢三更

月鴨水秋思萬里雲榻前會上征遼策
日下齋來諭蜀文沁府灣州俱竣事
玉堂聲價八方聞

九日次人寄示韻

浮名吾已倦鑑賞子方奇
偶抱經年病難忘九日詩
秋清山色瘦天闊鴈聲悲
且莫論遲暮幽懷付酒卮

除夜次士樹直中韻三首

歲月同奔馬文章愧畫蛇
好教埋硯石羞作拜燈花
壁鼠時時墮塞鴻遠遠斜
吾生元放達齊物擬南華
支衣呼野鶴分軸見秋蛇
落拓縻升米後先忝榜花
酒杯當歲暮鄉路入雲斜
空然文墨老玄鬢已素華

虛堂悄夜久雲際纈金蛇守歲看燃竹迎春已頌花
蹉跎勳業晚倏忽光陰斜到老詩思減徒然感物華
夏日元生有鎮以檢書官來投刺憶余十五年
前與子定元履讀書山寺生亦萍逢於禪榻之
間同研做業別後不復相聞今者相見顏貌依
俛問其年則已近五十矣道舊念今不覺流光
之感書此以識

點風不到梧桐樹紅焰如蒸日方午脫巾裸體隨意
臥甘露醍醐思未覩有客抱刺來重門未言先有熟
面存問君行年驚五十聚散紛紛不須論舟屋道人

松館士叅會東禪已廿禩見君皎皎冰玉姿談論瀏
瀏清風起散步或在齋飯前佔畢多從佛燈邊一別
不復相記問眉目自然念嬋娟我今青綾編日錄君
得烏帽作僚屬誰知昔年雲山別復登今日蓬萊閣
况子先人稱高行又有文章潔且清不以小枉媚當
世解符嘗與上官爭君今疎放如野鶴得非遺風拔
流俗龍門山水清如畫夢裏雲煙萬朶綠

鄭學究

翊周

配孺人李氏生烈特異鄉黨諸人

呈狀禮部特

命旌閭余嘗聞其事而感異之

今者其胤子銓來乞揄揚文字遂成長篇一首

以識其節行後有修史者庶幾取而觀之

完山有李婦勤素稱清門結髮耦學究系出光鄭昆
斗屋石假洞三日服練裙辛苦盡婦職仁孝罔不敦
英宗歲庚寅鄭生方淹恙家室屬遠隔糜粥違素養
百藥一無效七尺委床上醫去已覆衾婢哭且屬續
李婦誓斷髮籲天煇眼睛只爲一息存須臾未任情
東隣有婆媪來守共釜鑪謾言服人肉能令絕復生
婦曰豈其然雍容辭媪去潔室入沐浴七星在是處
訶叱遠僮僕冥冥作口語語畢自引刀割髀等膾炙
鮮赤方四寸跳躍似斷鯽熬汁納口中椽桶灌血滴

如是竟數日自然助津液耳悟若有聽眼明若有視
久之獲良已不知誰所起親朋競來集酒食道慶喜
或言李氏事未及畢終始倒屣披內帷慟哭久抱持
糜粉報不足糠粃似昔時下自井閉達上及廊廟知
傳道并來觀讚歎無二辭光輝助閎閱丹粉映綽楔
前史聞死殉并世得生烈我聞久嘆息曰此誠所結
非誠莫感天非誠莫格物起死豈寸鬻延生豈縷血
烈有感石虎孝有致冰鯉事本出非常未可論以理
我特道其烈簪珥俾爲砥我特書其事將以補國史

以眼病辭官有吟

如煙如障忽無端乍闔旋開兩苦酸蠟窻塗墨羞晴
旭磁碗和鹽試煖寒謾送桶膏爭說效或要碑楷不
知難從前黑白都休道差喜今朝好免官

南至前二日夢與國器飲酒梅花樹下劇談疊
疊而罷覺來夜已五鼓矣

風雨床空夜五更蘧蘧蝴蝶若平生癯容尚記梅花
下孤影猶餘燭火明王謝風流今不見伊周勳業竟
何成吾今世路鮮朋侶憂念能如昔日情

國器嘗以詩贈我勉以伊周事業李杜文章二聯及之

正月十五夜諸少年作踏橋遊事余以病不出

塵街如海夜如年來逐遺簪去墜鈿清高獨坐踈簾
月月不關人只澹然

詠庭鶴

白鶴勝於雪軒昂主人如百年滄洲計秋來夢不踈

申判書

應顯

輓二首

東陽節義華夷驚玄老文章漢兩京申氏高風來歷
遠乙年危牘死生輕久因衰病居閒散未乞殘骸爲
聖明是處青山遺直葬有誰勁筆勒新銘

先朝譽望衆皆知晚節優閒屬盛時門下蕭條無惡
客朝中言議有賢兒經囊藥裹忘榮辱世故人情悟

奕碁促席鍾山期勉重儻然中履我思之

尹相國 著東輓

終然 聖主識賢臣坑坎由來托契新清議 先朝
真學士令名元祐一完人半生嶺海窮經力二載巖
廊許國身公在喪車今不返舊時僚佐倍傷神

夢惟人

與子爲死別花開葉又脫經年枕上淚寤寐君顏髮
夜中忽夢遇不知何處所渺渺同水泚溶溶似煙渚
謂今哭抱持如昔語齟齬幽明杳一理情意浩萬緒
懷風自掩抑抱月空延佇

雨後偶吟一律示蓮社諸君

牽連牆屋小溪西翰墨追遊好品題綠漾酒鱗和竹
露紅隨屐齒粘花泥苦無新語驢磨迹悔做浮名麝
噬臍白袷烏巾吾所有駱山煙水信扶藜

高校理 宅謙 舊與交識聞今年謝歸鹿門舊隱

和鄭解元幽字韻以歸之

鹿門深處小亭幽歸袂清風吹不休生老太平惟有
退蹉跎身世尚何謀紙窻疏竹常迎月石田收禾祇
賴秋共繫扁舟嗟未得江南魚鳥使人羞

次蓮社諸少年韻

舍北舍南隔小溪
薜蘿牆短茆檐低
有時土壁虫書
落無復柴門鳳字題
蒼響錯從松子墮
鶴行分與竹
身齊蓴羹麥飯真
吾事好雨山田又一犁

霞溪曹君伯郁

鼎彬

至飲酒話舊

無端得馬又亡羊
一任紛紛譽且謗
牆北薇花晨浥
露月中荷葉夏疑霜
許身愧乏安邊策
借帙先抄却
老方好事不如省事
久懶琴吾欲學嵇康

和柳檢書惠甫韻

冷齋休官未休事
秘署時校聚珍字
低首小官二十年
萬事崎嶇不如意
處世還同消惡酒
腹中輪困好

安置時送銀瓶從借書
肯將霜靴來抱刺
契活賴有
瓜亭長秋後爲報田疇
易洞陰十月梅似雪
幾日同
君理短騎

徐學士準平出宰淳昌其行也不可無詩書此

以贈

西園脩竹綠齊檐
餞酒初醒臚韻拈
平日友朋同已
視輕裝妻子一身兼
自然吏戢無笞筆
莫以名高薄
朱鹽竹見南人碑在口
使君威望著於廉

冬夜與閔生君憲話舊

十載相逢聞子歌
梅花樹下醉婆娑
世無知我亦天

爾病欲止杯如月何漸瀝鴻聲雲際遠迷離山色夢
中多卜隣若得從吾願逝縱輕舟溯溪波君憲好酒能詩今年

余主國子試連見屈席間類有不平之語一聯及之

允翁祠版影幘將向後孫欽書載寧任所路出

京師余至江上迎拜與韓叅判用龜徐汝中魚

士翼用謙沈釋教同坐幕次

樞衣恭肅拜祠堂正氣英風尚不亡歿後生前魚水

契紫陽夫子又華陽時上賜祭祭文中自有朱子後復有朱子之句

江西太守趙國珍鎮球來別拈唐人韻以贈

屈首縻州尉非關室眷攜名高今世上官在大江西

落日隨鴻翼長程信馬蹄 聖恩霑寸祿慎莫嘆棲
棲

鄭承旨澤字輓二首

青袍呵導入薇垣流俗憚聞鄭正言自從先子懸車
後樽酒時時枉葦門

憶昔承華侍法筵 玉音頻叩老臣年公時倦矣無
封事眉宇精英尚曄然

正月上辛 陪享社壇恭和 聖製

新年惟戊戒春祈對越心香格庶幾稷飯社糕迎帔
舞殷絺周璧仰明衣銀河似水隨嚴霽瑞雪和灰應

律飛大有占之鼎象吉假鳴於器徹重幃

時粉養鼎鳴如鐘聲

太常以爲豐徵前亦屢驗云

三日遊駱山

蝴蝶逐人至踏青三月時春寒花落少洞僻雲歸遲
獨往開明性閒行詠逸詩無人知古道此意欲同誰

春日梨花酒告熟內閣翰苑諸學士以詩譏余
置酒不解飲至此之美女得薄情郎仍乞一壺
戲步其韻以送之

世間好飲無余上不飲猶能一欣然醉夢紅塵諸學
士姓名宜汰酒中仙

內閣與景深釋教諸學士次柳檢書訓字韻

柳令欹帽李几隱觀碁投壺俱雅韻詩成麤軸如牛
腰筆墨淋漓意匠運而我才疎忝僚席十年追逐敦
契分時清豈必饒封事恩重未忍便乞郡騎馬躑躅
時赴院一笑聊復開香醞撐腹詩書皆活法世儒踴
促求詰訓景深自號隱几子故云

惠甫次沈學士釋教泂字韻寄示馳筆以復

腹中車輪轉如雷十千斗酒澆以降世人媚嫵塗粉
脂笑我骨相疎而鷲賴有諸君文字娛雅音如聞金
石撞旗鼓已看樹壇壘風謠猶自達閭巷柳令鬢邊

玉環潔朴監腰間印組絳高談往往薄青昊文焰一
吐化長虹近日毛牲譏紫陽宋衛之怒至今閔安得
龍門神禹斧驅放龍蛇如疏洛

哭芝湖樵夫

任志雖違俗安貧不失儒放言誇宇宙隱跡有江湖
韻事今難見英魂誰可呼老妻收舊墨一哭葬樵夫

聞孺人以所著文稿皆入
實棺而葬之蓋遵遺命云

尚州金斯文

濟默

行著一鄉屢被道薦顧不偶

時老於布衣人皆惜之往年卜築于嶺南之求
道谷仍以名其室亦足知其老而好學窮不忘

道也今秋其胤子益耜以會心李文

敏輔

求字

韻乞余一言茲成小絕以副之景深及金學士

汝仁

近淳

皆和之

六十翁今何所求一生常恥與時求道不遠人隨地
遇此中高士隱居求

題景深家所藏泉漳逸民恩酹帖後二首

原韻
即靜

觀李文貞
公作也

誰遣南船不復來窮陰天地漠難開先生詩似春秋
筆寄與華陽大讀廻

倏爾靈風萬里來高壇直壓大江開侑詞 命揭崇

頑號時則 先皇諱日迴

南至前二日孫老景輝適至夜與曹君伯郁共

賦

駱山高士竹為冠未遇騷人不作歡終是新人難似
舊偶同癯鶴不勝寒微之太麗爭如賈籍也長窮賴
有韓美酒入唇多笑語知君杯戶比前寬

又贈孫君

處世謀常拙逢君語到微斯文天未喪吾道豈云非
雲闊鴻初度湖長客未歸呼兒仍貰酒薄暮啓柴扉

篆經齋與松孫宗人良師石老丁生志學小集

賦得甘紅露

天地終然視一朝劉伶酒德頌有大人先生以天地為一朝萬物為須臾無思慮其

樂陶養生齊物任呼招唐子西呼酒之和者曰齊物論有誰

支耐三杯過今日能令百慮消翻汗猩羶分與色對

看桃浪欲聽潮葡萄止却文園渴新蟹香蔬不寂寥

與松孫良師丁生夜集書船閣觀梅拈韻志懷

昨日梅花落一片今日梅花落二片一點飄來香減

却幾何千片又萬片幽人覽物仍悟老青絲白雪須

更變歲暮忽到書船閣碧氤飄颻揮羽扇對君舉觴

沉吟久詞客襟懷酒人面男兒遠圖壯年志十載經

綸抱書卷詩篇欲過曹劉壘學劍曾讀遊俠傳邇來
謬爲浮名誤王堂會叨翰墨選小技每被羣公獎執
經時登延英殿駑步難追騏驎蹄螢爝何補日月炫
報國無階空致身鏡裏鬢髮欲成霰壯心簸蕩功名
疎長歌傲兀星河轉丁生素志希聖賢石友剛如金
百鍊二君才學不艸艸老我虛名慎莫羨丈夫自有
無限業窮達何由論貴賤此夜詩思忽清發賓鴻叫
盡月到院下庭顧影心徘徊清風交與竹葉戰千載
欲記知心話回燈更拭端州硯

月夜與良師丁生對酌

天風何栗烈歲律將代謝幽人起百感清讌卜良夜
香點梅蘂落金湧月魄射抗行俗難合寡慾身多暇
二子秀而靚儒衿笑相迓蔬糲少戚顏絃誦比學舍
詩書闕里樂文學賴游夏止自獲麟後無譏檜以下

夜坐拈牧隱韻

任興身方豁調病意自寬歲華便覺易文字轉教難
梅作誰家別酒爲我輩歡不才逢 聖代未忍便辭
官

題李生扇畫畫是張漢宗墨蟹也

風軒聊復喚深卮一笑空煩左手持江湖歸興那禁

得紫解霜尊八月時

寄常山南使君士樹

驛亭秋雨憶飛觴老去離思欲斷腸游宦十年成郡
縣歸裝今日近家鄉天寒誰續梅花詠歲暮空吟蟋
蟀章文酒交情悲短髮錦江風急鴈聲長

雪中李學士性老存秀來訪

羸馬荒山下高齋小雪中文章關世道名論有家風
志退身將老經存道不窮舊交零落盡末路與誰同
時 御定三禮兩漢五子八家陸藁諸手圈成
書下七言十韻排律 教校正諸臣賡進應

命

龍光瑞氣燭天長手圈煌煌拱壁藏行墨抄時同筆
削研朱點處合圓方姬經戴翼辭純素馬法班筋氣
老蒼五子微言垂百世八家陸奏摠羣綱稱量不出
權衡度博約皆歸禮樂場金玉始終昭著理珪璋判
合爛成章燕貽謨訓符經緯娟濩從容近縹緗簸却
粃糠資菽粟搜來錦綵製裘裳班班制作追周宋秩
秩聲明軼漢唐心法元從文字見執中精一法虞皇
祈雨楮子島與申檢討絢 洪翰林夷周 同舟性
老學士亦至

微風天正好今歲雨全稀孤島煙中出扁舟洛下歸
狎鷗愁淺水語鵲刷乾衣信覺江湖闊何人枉是非

曉發斗尾

秣馬離郡次出門星尚流此行窮峽路幾日到原州
月落漁舟曉霜清驛樹秋終南看漸遠那慰旅人愁

舟中見龍門山

小雨如煙蓬戶開龍門山色望中來故人白髮還相
憶一笑聊持地主杯

時地主送酒
饌末句云

余蒙 恩按節東藩之翌月值大碩人壽辰設
小酌于觀風閣仍作七律一篇以道感 恩識

喜之私

遠去初非便乞身閒藩祇是慰慈親關東一路逢豐
歲天下名山作主人燕學錦裙迴舞閣鶯諧珠管繞
歌茵高堂酒似 君恩重詠罷南陔望北辰

書船閣偶吟一絕

竹籟荷香野正秋讀書聲在畫船幽瀛洲莫說浮槎
計鸞珮三時夢玉樓

昭陽亭吟示李知府

普天

欲買名區須買閒清貧太守是仙官夕陽恰似江南
畫秋水浮來郭外山九月家鄉遲鴈信中流笳鼓送

船還最憐此地多蕭瑟歸去應存夢想間

自聞韶閣攜妓笛舟下昭陽

錦帆秋晚過垂虹楓葉菰花映水中雲闊長江千里
路月明簫鼓下清風

夜宿表訓禪院吟示高丞 鳴鶴

黃稻中秋飯青楓九日杯月明人語靜風遠佛香來
詩到名山澹秋因落木哀圓公同我宿禪榻淨無埃

釋戒圓自長安寺從余而來
為人頗聰明比大顛無媿云

將尋靈源洞坐鳴淵石上偶吟

四山沉碧樹酣紅蘆鴈汀鳧似畫中獨往溪頭不垂

釣幽人心事在秋風

步至王築臺令朴生吹簫三四弄痛飲至夕

危臺臨絕頂身與列星叅雲捲千山瘦霜深萬木酣
暮鐘聞古刹秋月照寒潭痛飲真吾道玄心不在談

靈源庵

秋光清可愛偶與上人期轉入山圍處能趁月出時
鍊丹餘日觀浮白坐天池奇賞死方已登臨莫嘆衰

噴雪潭

不妨時人喚我狂芒鞋蕙帶日徜徉松濤疑是千峯
雨楓酒經來萬壑霜九藥山房修禊晚品泉林磴覺

衣涼每逢水盡雲生處久坐渾忘世路忙

龜潭

幾日無聞雞犬聲羣峯迴合晚楓明流水坐間明月
出亂山行處白雲生林中香雨僧初返石上紅泉路
轉平自有冥心靈境會藏名不欲漫題名

真珠潭

晴巒環列玉芙蓉衆水研勻凹石春秋後淨無餘一
葉雲間時或失千峯松杉古壁巢金鶴風雨深潭起
火龍福地閒人天所放不妨斜日挂藜筇

內船潭

月出吾在舟雲還吾不還吾應懶於雲舟亦重如山

外船潭

雲逐崩濤急雷沉鬱浪還恨無謝靈運何似石帆山
坐香爐峯下俯見澄潭雲色漣漪可愛

香爐峯上雲起時香爐峯下水漣漪乳浮甌面花膚
白墨潑潭心石髓薰霧峯重重起泥海金蛟冰鉢光
琉璃兩腋忽欲生羽翼一面恰容鑑鬚眉何必理屐
捫确拳何必濯纓撓虛白怡然坐我天門上萬象森
列欣自得名山洞府萬二千大小香爐紀靈籙龍拏
鳳栖今幾年天帝留與神仙宅子房之師赤松子永

郎之徒有南石飛行恍惚誰解尋天末簫聲留戛玉
十載塵網勞夢想今日香廚共禪席地爐活火無斷
續石龕清磬來歷歷葡萄酒熟黃似鵝茯苓夜煮瑤
草綠移筇更隨圓師去霞潭水色又紺碧

萬瀑洞

幽深洞府拄筇行到此方知萬事輕古澤龍吟常雨
氣深松鶴返自秋聲身參河漢行杯近地遣雷霆削
斧成老死東南吾不恨茲遊始信冠平生

同宗人伯高遊摩訶衍

日月開蓬島煙霞鎖珠宮香城疑雪白危石歷楓紅

丹燒龍虎化笙引鸞鶴逢片月留道觀遺經想覺公
寒燈無續火孤磬掛清風時候逢秋好嘯詠與子同
懷古孤雲去登高滄海通瀑流隨惡雨棧道截殘虹
飛鳥同王喬停杯吊葛洪登攀遺物累意與路不窮

歇惺樓

攜策訪伽藍迢迢及側景上房飯已畢孤磬挂松影
好事不知倦登樓騁遠矚嗟我萬千峯削出芙蓉玉
陰洞灑白雪陽崖接丹煙歷歷衆香城森羅在眼前
還如衆菩薩重重現法身光明迥離垢清高遠謝塵
天丁劈神斧王喬住絳節楓桂老千秋簫響在天末

俯視一氣白銀河近酒盃萬狀變立談雲霞互闔開
我興殊未已蕭瑟值秋風解衣任盤礴覽物入冥濛
境深情不極形忘慮則消於焉出山門燈火耿虛寮

鴈門嶺

遠寺鐘聲度嶺微回首毗盧散夕暉前路直與滄海
闊莫惜游筇出洞歸

望毗盧峯

入洛必欲登嵩岳過魯必欲謁闕里今余窮探金剛
勝意欲衝河死未已蓐飯來到毗盧下萬丈碧出煙
霞裏芙蓉散墮千劫雪瀑布留經往會水峻層石角

無戴土蒼苔滑不受屐齒恍然坐我滄海上手攀金
繩空踏躋誰云髣髴望顏色已覺浩蕩清心髓佳境
每在未盡處色相何必求尺咫風下指點一抹奇目
中領略千仞美君不聞韓公痛哭華山嶮君子見高
宜戒始

九日遊玉流洞

山靈猜俗子陰霧故霏微潭深龍一吟秋清鴈孤飛
值茲重陽節幽懷感殘暉折簡地主會插菊野童歸
石氣侵衣冷松籟吹面醒合流爭噴薄雷雨蓄怪靈
初疑水氣白復訝林木青娛心能自適流矚無暫停

清讌當枕席佳境險處經此地可攬結何由置小亭

九龍淵歌

九日遊王流洞同遊者要我觀九龍瀑布余平生行世常以擇地而蹈四字爲安身之所况山水之遊適興而已行止我自爲之何必冒險遂辭不入

君不見九龍瀑布掛長天飛流直下三千尺上有慘澹雷雨之變化下有蜿蜒蛟龍之潛伏雨脚翻遮朝日暗雲根倒瀉秋河落六月飛濤山骨裂灑作冰花吼萬壑攀援鐵索緣棧道石磴苔滑難駐足鬼神森

列毛骨竦霹靂坐覺坤軸弱上清真人邀我見我辭不入空歎息君不聞履道涉川在大易大人謙謙幽人貞靜者常吉動者悔平生我足擇地蹈坦坦如砥周道在君子居易而俟命小人行險而僥倖世人重日輕性命滅頂滅趾理無幸欲攫龍珠宜戒淵欲捋虎鬚常陷穽此言不獨水以喻誦之兼欲浮世警

余自金剛歷登高城之四仙亭壁上有先君子舊題感賦七絕三首刻揭下方

落日青山映遠沙雙飛乳鴨啄菰花水底雲間重疊嶂誰家知是赤松家

泛泛仙槎八月天
銀河欲墮山蒼然
一自永郎歸去
後寂寥笙鶴又千年

我亦紅塵醉夢醒
登亭忽覺軒駟輕
每當明月無人
夜碧落如聞戛玉聲

清澗亭效杜體

今日初臨海經旬
始出山滄溟龍氣伏
古壁鶴飛還
未信吾行遠渾忘世路艱
漁鹽無廟策肉食愧吾顏

洛山寺觀日出

金雞喔喔海桑枝
候日齋誠坐曉遲
不有聖人爲漆
夜從今天地際
明時混沌開
闢元同理華夏蠻夷仰

盛儀回憶殿門正至賀
舜衣光潔侍臣知

宿洛山寺東樓是夜海月明甚

九月滄溟三萬里
風靜波濤夜猶白
况復萬松月魄
射琉璃天地湧金碧
秋雲落片大於帆
七星去樓只數尺
我來兩腋欲生羽
爽然如躡銀河冰
明日鏡浦仙刺史
畫船笳鼓下江陵

鏡浦臺與趙承旨興鎮權正言駿具知縣縉宴

飲諸幕府皆會

平沙木落水鱗鱗
去國登臨倍愴神
彩閣高能分蜃
氣澄湖深不沒鷗
身唐詩晉畫誰加麗
楚水吳山更

覺真幕府使君同在舫綠樽銀燭挽遊人

踰大關嶺

役車何日息人事自紛紛直接茫茫海長留漠漠雲
林疎無虎跡天遠起鴉羣世路羊腸險吾衰豈足云
宿清虛樓

澤國清霜早重陽野菊衰我來明月俱若與幽人期
夜長蟋蟀苦天寒鴻鴈離漫懷江海志役車復何之
繾綣仍不寐寥廓欲同誰

次農翁韻題合江亭

山明江合處突兀廢亭奇偶得幽閒地高吟隱遯詩

花開春黯澹魚戲水漣漪松桂當清俸讀書縣宰爲

登五臺山絕頂

聞說 光陵駐王鑾千年松檜欲飛鸞秋河倒瀉天
門落朝日翻懸海道看霧豹成文靈氣積玉龍埋字
霸圖寒吳閭疋練依微見矯首齊煙九點團

正宗大王輓詞二十五首

旌翼逶迤漢水湄千官劔珮復何之臣非木石胡寧
忍萬事如今欲不知

前後清河屈一千重光日月壬申年 銅闌令德源
於孝聞自先臣侍講筵

代聽 英考倦勤時銀印煌煌燕翼貽每誦依孫依
祖教於戲 聖德止於慈
一部編成義理深中天燄日破羣陰蠶絲闡發麟經
後鈇鉞先誅亂賊心
微辭精義得其中儀節 宮園自折衷以竢聖人應
不惑信如天地四時同
重宸三復冽泉章彼美西方不可忘每歲暮春 皇
帝墀七旒偃僂佩聲鏘
大人爲學自修身聖不可知是謂神孔子以來朱子
統於吾何幸見之親

地緯天經煥有章周情孔思又皇皇龍圖二百藏書
閣雲漢昭回上有光
右賢左戚際清明治世規模一副成二十五年登擢
者宦官宮妾不知名
清朝器使備羣工 聖鑑昭昭觸類通苟有一能一
藝者未聞虛老草萊中
華陽正脉接關閩 社稷功存四大臣曠世再逢魚
水契褒忠彝典歲回辰
園移灤水久含哀天作花岡福地開每年元月流虹
節做昔戎衣展謁廻

華城經始十年餘宮闕非徒壯厥居未老閒亭成未
久廢儀忍說似 鑾輿

晨昏問寢藹餘誠日月覲瞻步輦行或值攝儀如不
祭齋宵燈燭徹雞鳴

冬日鹿裘夏葛衣上書囊取紙爲幃至情不受揄功
冊孝子千秋識庶幾

丕變文風漸復初六朝綺麗痛先除遂令一世操觚
士口誦紫陽夫子書

穆然清禁萬幾餘綈裘穰穰盡五車圈點縱橫經手
定看如河洛出圖書

大慶今春 冊禮成三加同日縉儀行到今此事惟

無憾益驗 宗祊默佑靈

冲年含恤慟何言 聖繼神承達孝存岐嶷天姿新
御極邦基鞏固泰山尊

人情悲喜八方均 長樂垂簾故事遵復見女中堯
舜聖肯教專美宋宣仁

愚夫愚婦忍爲辭旣哭其公又哭私况臣徹地終天
慟却在東藩待罪時

瓊林春雨宴諸臣簪筆殊榮賜盖辰自此翱翔羣玉
府十年 恩禮似家人

承華晝晉漏遲遲夜對金蓮撤座時密勿風雲深際
遇餘人猶未盡知之
前夏延英賜對筵茶餘留坐 王音宣 宸章二疊
臨東土 恩語深憐老母年
蒼梧極目白雲深未死孤臣若為心勸講新承 慈
聖教追先殊遇欲圖今

金陵集卷之三

金陵集卷之四目錄

詩

洗兵館

沒雲臺

敬次高祖考文憲公榮川雙清堂舊題韻

巡到花山攜金叔道相任元履遊映湖樓知府

鄭文瞻東觀設歌宴金禮安直行宋龍宮景

載韓奉化者裕沈義興能秀徐營將翼淳鄭

丞信氏皆不約而至

永川朝陽閣謹次栗翁韻

將赴南海舟次有作

九日錦山懷元孺良

在明

史局與國舅金領敦士源慶世釋教拈杯字共

賦

西湖舟中吟一絕示金姪仲吉

秋日歸又思穎亭

遁村卽事二首

山中送仲吉歸儉溪故林

與傲齋松孫李高兩生遊清溪暮歸山莊

賦黃花

春山欲雨亭觀箕埜村家四景圖

又思穎亭漫吟

贈清溪寺僧

溪上懷韓學士子淵

兢履

讀史五首

權生草堂

自遁村入京歷拜秀野韓相公於富春精舍賦

一律

簡景深

寄韓山使君李元履

贈芮生

和琵琶西李判書集斗元宵寄示韻

和曹判書允大園亭韻

又思穎亭次歐公韻二首

過子淵林庄有懷而作

贈傲齋

南城朴留守宗來送酒

駒城俞使君漢石聞余來住溪庄具酒饌來餉

詩以謝之

遊清溪

西京懷古

到葱秀吟奉副使林叅判漢浩書狀金應教魯

應兩行人

練光亭次三淵韻

百祥樓

龍灣客館遇生朝志感

將渡鴨綠書懷三首簡洛中諸友仍題亭壁

贈劉秀才士元

白塔

遼野

太子河

途中偶吟

太平車

大凌河

到寧遠衛紀行

祖大壽牌樓

姜女廟

山海關

澄海樓

紅花店宿謝進士家

拜夷齊廟二首

薊門煙樹

同兩使訪香華庵

曉發通州效杜體

玉河館簡呈兩使乞和

詠宮戲三首

玉竦橋

燕館觀倪迂山水卷

贈陝西褚秀才

裕仁

贈吳孝廉

思權

見訪

簡高秀才

揚清

圓明園燈戲四首

壽心庵李主事

林松

母太恭人

水仙花

上元夜與兩使步出西山石橋翫月

拜文丞相祠

薊州途中偶吟

紀行一首簡呈兩使乞和

榛子店

二月初八日到永平府別咨官來到傳家中安

信兼致沈叅判釋教書扇三詩途中次韻二首

次沙河縣

桃花洞

夏日訪性老林亭

罷官歸又思潁亭

墳庵酬里中諸君

秋夕與傲齋仲吉作

與傲齋坐石上徐君聖彝適至

鄉村卽事

送徐慶世觀察關西

與國舅金領敦士源沈稗教遊宋洞賞花

又拈杜古用聚星堂詩令

成北青士執輓

將歸廣陵訪孺良江亭不遇

歸遁村以病經旬不出

秋夜偶吟

歸路遇孺良登江亭打話

泛舟西湖憶子淵

送趙叅判弘鎮赴燕京

試院與洪叅判夔周洪叅判義浩鄭承旨來百

金叅議愚淳尹大諫益烈趙校理庭和申正

言在植南持平吉寬沈典籍能稷聯句

入天磨山觀朴淵瀑

小豐樂亭次歐陽公韻

李君受魯益將還楊炎故林敘別書贈

著庵俞公漢雋輓二首

與李新老在秀子淵小酌梅下

食櫻桃二首

西池與新老性老君受子淵會飲李元汝義甲

亦至賦得蓮花一首

送朴叅判宗正赴燕

簡李學士君受鄉居

暮春以奉審 本宮至駱山下記余與元履自

少小家城東遇花柳時節頻來遊此地今忽

三十光陰矣元履又作宰清風昨纔別去感

賦一篇以寄之

四月二十三日為檢漕船出江倉歸路與景好

吳士默淵常南公勵履翼遊湖上拈韻共賦

舟訪景好江榭邀公勵同飲

內閣校正 先朝御集次諸僚韻

楓臯晬辰次諸閣僚志喜韻以壽之二首

新老將赴耽羅察理之任與性老君受李子田

龍秀設酌梅下以餞梅兼送君分韻余得餞

字

李畫師寅文山水戲墨

金陵集卷之四

宜寧 南公轍 元平 著

詩

洗兵館

元戎開幕府高館枕臺隍鼓角凌風迥艤艫壓海長
挽河懷壯士覽物憶神皇萬里斬鯨意平臨出日
方

沒雲臺

涵白浮青萬象紛滄波無際渺難分天邊海底千層
嶂收處祇應一段雲

敬次高祖考文憲公榮川雙清堂舊題韻

遠山濃似酒迴澗淨如油鑑賞經先輩名聲勝大州
牛羊村向夕蟋蟀野宜秋太守無錢俸讀書賴此樓

巡到花山攜金叔道相任元履遊映湖樓知府

鄭文瞻東觀設歌宴金禮安直行宋龍宮景載

韓奉化耆裕沈義興能秀徐營將翼淳鄭丞信

民皆不約而至

森森川流直藐藐林木平旌旗龍抱影笙簫鴈和聲
極目睽沙闊怡神眺野晴開宴復好顏停蓋使君迎
向夕風泉動簾幔燈火晶甄萱窺陀耶新羅時號府名為陀耶

百濟拔全城倉皇紅賊亂車駕避甲兵高麗恭愍王避紅賊來住

福州今為安東府干戈幾年熄山高復水清或有憂亂世未

可稱達生

永川朝陽閣謹次栗翁韻

亂山一碧蘆花秋疎雨涼風滿古樓回首不堪京闕
遠莫言吾道在滄洲

將赴南海舟次有作

清秋探幽異揚帆入海島磴危楓桂亂浦闊鴻鴈早
獵道來十艘舉網朝日皓林隈見錦山俯臨水浩浩
虛泛幾時過崢嶸千載老上船聽鼓角離陸情未已

得如忠武死真不愧男子大讀華陽碑如遇地尺咫
蕭瑟 寧陵柏九原泣壯士

下句用碑中語

九日錦山懷元孺良

在明

孺良以京試官來嶺南留宿二日而歸余亦
旋有巡審之行仍不得以書相問九日登高
尤覺少一之歎茲用一絕以寄孺良在營時
余送女妓則讓而不有末句戲之

錦山黃菊屬重陽風拂帆旗海路長今日外臺何處
宿官娥皆道鐵心腸

史局與國舅金領敦士源慶世釋教拈杯字共

賦

衰髮疎才足可吟漫隨班范且遲徊編年恰到 行
宮宴前席曾霑乙卯杯

西湖舟中吟一絕示金姪仲吉

明沙黃葉一孤舟野渡寒煙起白鷗此去遁村山水
好蟹肥稻熟又清秋

秋日歸又思潁亭

一封疏懇戀青山未許辭官許暫還極日時憂猶未
了林泉難覺此身閒

遁村卽事二首

恨未學農早強爲野老居蓄菹先雪下拈葉待霜餘
麤治觀稼樹時抄種樹書暫來尋舊址閑曠意猶舒
乘輿肩輿出看山至夕陽藤蘿縈老石籬屋隔重岡
潭靜識魚性林深聞麝香荒村無好客誰與討文章

山中送仲吉歸儉溪故林

仲吉卽余外戚也余守制廣州仲吉來會至
喪畢乃去其情意篤至者也

寒山欲雪路依微疋馬南天鴈亦稀先墓種松青可
見華門話別淚沾衣

與傲齋松孫李高兩生遊清溪暮歸山莊

秋高天宇肅霜深卉木潔山晝忽眠醒促輿陟嶒嶸
黃花媚遊人時序過九日峭峯崒然直瀑響拔衆出
蘚縫滑石乳松籟噴珠雪稍稍憇雲林盤盤進微步
興湧力自副筇屐皆坦處香醪旣酣醺新詩倍清悟
收攬我自得意難分與人虛明不可把孤絕但怡神
暮擲山齋宿行行雲逐身梧桐蔭屋老竹色入門新
前遊信難傳胸臆自清真

賦黃花

籬前黃菊過重陽枝傍霜暉影許長直待衆芳凋落
盡歲寒清節獨留香

春山欲雨亭觀箕笠村家四景圖

春景

處處聞鷓鴣春風三月時柴奴亦一癡牛背馱花枝

夏景

平疇一青茁野水出濺濺田夫方午饑麥酒又飯兼

秋景

殘荷如病人禿柳比髮梳白鷗偶一飛天晴疎雨餘

冬景

衆山鳥飛絕平地雪漫漫偃蹇庭後松獨也保歲寒

又思穎亭漫吟

秋後田家物物清澹楓濃菊媚新晴西山雲缺鶴飛
去小港荷殘魚負行偶爾亭名懷永叔居然歸賦似
淵明何時心不爲形役千卷琴樽娛此生

贈清溪寺僧

翩翩一衲子導我入青楓霜落空潭潔樓靜白雲通
擊鉢卽呼韻詩成響未終

溪上懷韓學士子淵

疏履

前年秋子淵陪其叔父秀野相公訪余溪亭
一宿而去且子淵買屋溪上與余爲晚境歸
老之計而今縻館職不來悵然有作

年前孤棹溯西湖見我燈邊憐皓鬚別後歲時多變
改今來山水自清癯屋連巷柳同聞犬路夾浦蕖好
逐鳧幾日更逢溪野雪捉毫閒寫鹿門圖

讀史五首

人臣貴直道君子不言權嘗讀留侯傳卓乎平地仙
但有四皓事虛誕異昔賢叔孫亦腐儒善諫豈必然
擊蛇不易腕搏獸不旋踵君子欲圖奸風霆見神勇
除闞太暇豫陳寶不自重所以平與勃奇謀有素講
藩邸弑太子天倫亂弟兄貞觀雖云治惡乎逃惡名
吾憐魏鄭公清議攻平生當時抱經濟一身非所輕

只從亂兵死功業誰復明孰非建成臣房杜爲公卿
介甫創新法宋祚遂分裂東坡若得志其禍乃更烈
論人以已迹吾未斷臆說君子觀其大完人語其終
荆公謹細行大意苦未通坡翁雖輕薄終求節義中
君子豈亡國餘黨未必善吾讀東林傳掩卷涕常泫
門戶盡割裂言議何其褊浸浸爲膏肓賢者亦不免
神熹久御極已致國步蹇逮至崇禎世壞屋不可支
君子求其備小人衆所知闞兒固可誅東林責難辭

權生草堂

愛爾草堂僻栽松作翠屏教僮蒔竹法課子相牛經

雲氣通身濕溪聲徹歲聽與人無一擾朝暮醉還醒

自道村入京歷拜秀野韓相公於富春精舍賦

一律

山近池塘雨氣纖前春栽竹綠抽尖寒梅小屋藏書

帙衰柳孤村訪酒帘言必傾困皆赤悃退猶憂國已

霜髯于今廟策憑誰仗語到醍湖淚更添時靜修李相公新逝

云故

簡景深

詩札昨來今復來燃香大讀笑顏開芝峯明月清溪
雪歲暮歸心一樹梅

寄韓山使君李元履

老去思常遠別時髮已斑離家多歲月為邑又湖山
鏟俸除民瘼燒鞭化吏奸昔遊渾夢寐風雪掩柴關

贈芮生

紅梅殘雪歲寒時忽遇高人芮益之故紙墨香猶未
歇屏山誌狀研蕉詩

和琶西李判書集斗元宵寄示韻

元宵有月今幾圓欲做青蓮一問天我獨光華安坐
得人於街陌往來連橋通御路明如海樹接山樓遠
似煙忽見琶西詞老札欣然把酒又梅邊

和曹判書九大園亭韻

已識無塵事還看起小亭閑雲行處白脩竹坐來青
散飯鶴來集吟詩魚出聽乞歸方未遂幽意寄林扃

又思潁亭次歐公韻二首

及今安得逐漁釣猶可林攀與壑躋千古高風懷永
叔每來溪上潁詩攜
殘荷門掩亂藤垂隨意看書又着碁乞身何必三宜
去歸潁須趁未老時

過子淵林庄有懷而作

主人今不在瘦馬路猶諳雞犬留空巷虫魚墮古龕

深山秋政好流水意何堪百載棲遲計卜隣結小庵

贈傲齋

研巒林樾好爲隣野服翛然不受塵痛飲君惟非惡
客忘言吾亦作閒人水寒古澤稀魚子霜落高邱淨
鶴身懷抱百年誰與識早衰於道愧知新

南城朴留守宗來送酒

今朝誰爲好懷開九日南城送酒來忽遇玉樵非折
簡鴉白樹下笑持杯

駒城俞使君漢石聞余來住溪庄具酒饌來餉

詩以謝之

使君來不約茲事最多情
落葉圍全壑殘霞照遠城
粉油花粧膩糖瀝竹醪清
遺直傳家遠長懷石隱名

遊清溪

今朝風日妍遊山短筇扶絕巘
輕虎豹清湍逐鴨鳧
轟吼瀑聲壯秋老木愈癯峻
嶒見石髓虛白澈雲膚
清爽如可攬欲畫未卽摸
岸憤任蕭散長歌擊玉壺
瞥看難盡憶暫閒聊自娛
同賞儘愜性秀傑傲叟俱

西京懷古

舊址花甄草沒湮礎圍鞞響
憶依然使臣來去三千里
故國興亡五百年獵道毬場
餘落照舞臺歌殿只

荒煙幸今生際昇平世
四牡安閒賦酒筵

到葱秀吟奉副使林叅判

漢浩

書狀金應教

魯

應兩行人

御史聲標峻侍郎如玉人
此行知甚遠三宿覺逾親
天末心常繫途中髮欲新
長亭聯馬尾過嶺首迴頻
練光亭次三淵韻

冠蓋幽燕去管絃清浪遊
千年箕子邑東國岳陽樓
列嶂沙邊見平江堞外流
明朝安北路別意在蘭舟
百祥樓

劍光明閃妓粧新
蘊笠風欹墮髻頻
每歲驛樓迎上

客夕陽江樹挽歸人畫船紅燭香鋪帳錦瑟銀瓶酒
汗茵已是眼前多悵黯路分南北水鱗鱗

龍灣客館遇生朝志感

旅館逢初度鴨綠天一方幕客來相問家人想應長
持盃倍惆悵覽鏡還慨慷但愧身未休不憂鬢髮蒼
朝瞻五雲端暮倚北斗傍原隰詠皇華 王命慎所
將君子崇明德履道終允臧

將渡鴨綠書懷三首簡洛中諸友仍題亭壁

旅館寒燈夜雨垂時看書扇故人詩定知別後君相
憶不及天涯我所思

甘紅名酒淺斟卮七日江樓破寂碁山入九連青朶
朶燕雲遼鴈影參差

紅裙匝唱船離妓淚多於楚雨滋誰向江頭腸不
斷芥人豆馬岸窮時

贈劉秀才士元

秀才自稱山西定平縣人來住甜水爲三十
年云

遠山眉聳對炕初甜水莊居數里餘笑道折風巾好
好自披蹄袖語躊躇

白塔

斜陽鴈去高麗國大雪人過狼子山華表巋然仙已
遠珮聲天末憶珊瑚

遼野

四望天低黑金蛇纈電光吾身憐渺渺坤軸正茫茫
中自風雲蕩一何道路長平生稱快意巖險絕羊腸

太子河

昨過太子河天寒水瀾瀾人言太子丹走死河水裏
幽燕有此河其名以太子卽地以求名傳疑仍謂是
邂逅王秀才頎然博雅士爲我一辨證言此古梁水
距衍殊甚遠輿地載圖史聞茲增感慨話言爲移晷

擊蛇不易腕搏虎不旋趾徐把秦王袖圖窮始出七
嗟哉彼慶卿劍術太疎耳疎劍乃餘事胡爲輕一死
丹固妄男子不忍一朝恥此舉旣無義托身何所恃
豪俠重意氣交遊慎知己子房儘明哲擇木又義起
椎劍豈有異盜傑不相似何論行與梁憑名吊水涖
惜卿失所交不作太子誅

途中偶吟

十三山下晚經過獐子河流望似巴禿柳疎煙袁氏
店長程寒雪太平車乾坤爲客無書信道路關心感
歲華却憶王孫歸未得連天草色使人嗟

太平車

太平車太平車朝來暮去相經過
檐帷捲青粘琉璃
男戴紅兜女髻花衡輻兩兩疾如飛
蹄翻碧玉跨驊
駟南商北賈競後先不似豪俠遊
狹斜金銀銅鐵綾
羅緞糖餅菓酤米鹽茶輕車一去重車歸
十吊百吊爭少多禮義廉恥都已矣
財竭民窮可奈何古者聖王為天下賦
斂不惡政不苛是以市廛無貳價男女
讓路民俗和太平車太平車一車足覘天下勢而况
神器大於車

大凌河

高河水急鴈賓初河柳行行似藝蔬
自是英雄爭戰地車前風雪一蕭疎

到寧遠衛紀行

長程無賴遣愁懷
鬢髮多因看字指
修爾梅花當臘候
有時魂夢到天涯
佛光圓漆東人笠
弓樣尖紅漢女鞋
勲業祖家還咄咄
牌樓千笏立通街

祖大壽牌樓

街肆裝煙暫住車
欲言明季淚先多
八家新宴聯棚綵
孔雀翎鞞倚橐駝

明季時事至今歎惜如袁崇煥以讒間殺之祖大壽兄弟則恩賞太濫牌樓窮極奢侈與兩使適說

此故云。清太宗宴崇政殿，洪承疇、祖大壽等八人與宴。又令八家各宴一次，賜紅寶石孔雀翎、鞞、白橐駝，出開國方略。

姜女廟

半似顰眉半斷腸，水容山態入愁長。最憐祠下梅花樹，歲暮貞心死有香。

山海關

萬里吾行遠，經冬始得來。長城連薊碣，南海控登萊。謂此誰能入，卽今事可哀。千秋蕭顯筆，擡眼望嵬嵬。

澄海樓

中山當日足威靈，遙見城身入海青。雲闊鴈聲來碣

石月明龍氣湧，滄溟關河萬里無。真主豪傑幾人上，此亭騎馬朔風吹漠漠。遠遊篇就酒初醒。

紅花店宿謝進士家

謝名良璣，以進士出身官知縣，宦遊江南，身歿家益衰，落其妻眷。以外廊付家僮爲客店，良可悲也。林亭頗蕭灑，可喜。兒子能讀書，偶

吟一律

君曾辛丑榜中，豪宦沒江南。歎未遭雪瀑，時從松子落山樓。爭與竹身高，桌間茶瀝留。磁碗壁上諸篇剩，禿毫清朗書聲聞。徹夜傳家遺業有兒曹。

拜夷齊廟二首

武王討有罪順人而應天夷齊獨何心餓死首陽巔
當時叩馬諫非謂武王然深知撥亂功將爲後王師
征伐有口實篡奪假爲辭所以歌虞夏終亦慮莽操
彼權爲斯民此義不可逃遂謂非聖人後儒自輕恍
殺一與行一得天下不爲區區後世名詐能重伯夷
特立行吾義無悶不見知曰仁曰恕希稱道豈有私
惜哉太史公并稱附驥賢雜引由與光欲以傳此人
薊門煙樹
澹蕩如雲外森茫似海中欲知奇絕處但看夕陽紅

同兩使訪香華庵

經回勞已極遊樂償堪當山靜開人性風清聞佛香
護碑留寶塔演梵講禪房宴坐稍蕭散且寬戀故鄉

曉發通州效杜體

燕都看漸近今日是通州鼓角依城動星河入樹流
風塵爲客老時序聽鴻愁萬里心常遠行行戀玉樓
玉河館簡呈兩使乞和

凍雲如墨水汾河梅柳殘寒強半開書帙買來多舊
見年華一去不重迴隔炕時乞裝煙火圍燭頻斟餞
臘盃勝事較前還有異共憐鬢髮日相催

詠宮戲三首

漱芳西廡翠雲樓粹玉昭金瑞靄浮

西廡書金昭玉粹四字即皇筆

東國使臣黃犀帶當朝貝勒紫貂裘畫屏芍藥張羅綺
密碗葡萄刻瑪瑙為是年終呈雜伎內伶先出打

紅毬

燕京年終每設宴呈伎戲故云

安息薰壇鼓樂鳴諸蕃來貢樂昇平荷包蝶翅斜摸

粉竹梯鶯粧倒送聲東製衣冠傳寶筏西遊宮闕象

金棚

東人冠袍為戲子服又演西遊記為書稱昇平寶筏

翰林撰進新春詔黔

蜀前年已罷兵

琉球蒙古旅庭時復道南州貢荔支戲子絨袴騎白

馬才人氈帽舞青獅雲根洞額乾隆筆

西扁有雲根石額即乾隆

親筆繭紙柱聯董誥詩指點綺窻聞笑語定多承寵不知誰

王竦橋

柳如人字覆朱樓橋影吞虹晚不收地利箕星通象

緯水光銀漢共沈浮宮牆睥睨連層榭溝道逶迤引

綵舟玉甕歌成明月出直疑身已到瀛洲

燕館觀倪迂山水卷

倪迂性好潔盥頰臨畫牋畫山易衣冠畫水止唾涎

扁舟往來湖泖間胸中邱壑羅森然此本知作避兵

日印識尚記至正年蟹庄瀟灑似江南野渡孤艇古
木前秋日溪巒樹滿霜春風籬落柳罨煙律兀匡廬
千萬峯會聞讀書留謫仙飛瀑截空難手追道子營
邱知誰賢尺幅雖短勢千仞筆墨以外銀河漩我行
遼野千餘里不見水涯與山巔胡沙漠漠日遮眼及
來南館愁纏綿堂上忽生山水思久客亦足醒慵眠
時呼二价共賞翫又是梅花歲暮天中間興衰何足
道此物知有神護全付與後人重裝潢莫令蝴蝶化
翩躚

贈陝西褚秀才

裕仁

旅館逢清士梅花落點床箋經尊晦父懷祿愧歐陽
心自安閑得言因愛好長君家名節好餘事視文章

褚郎遂
良後裔

贈吳孝廉

思權

見訪

談屑澄於雨後雲新春邂逅慰離羣詩評有袞終無
鉞深恐交情未十分

簡高秀才

揚清

白頭傾蓋遣羈愁河柳將芽雪水流衰懶欲謀歸賴
計莫云高節似前修

圓明園燈戲四首

沉香欄下畫龍床錦幔風披炫晚粧天子太平洪福
字當中羊角萬燈光

回子銀箏迭奏前西洋巧伎看鞦韆綵繩流火俄如
電匝地砲聲霧漲天

璿瑜鮮赤染猩猩繡障銷金翡翠翎螺盒開時紅燼
落忽然樓閣忽銀屏

鴉青緞子賜蕃時黃帕擎來王侍兒箱車更向紅欄
去明月初高太液池

壽心庵李主事

林松母太恭人

條風初暢酒盈觥怡樂融融老太平才子文章還薄

祿足知賢母外榮名

水仙花

高士元來愛澹華梅兄好伴影橫斜欲把名牋摹一
本毫端香氣蔚雲霞

上元夜與兩使步出西山石橋翫月

便衣偕散步興湧覺身輕春到羣生樂月高萬國明
閭閻多聚集宮闕鬧歌笙歷歷河橋樹如含遠客情
拜文丞相祠

取舍能知熊與魚忠臣祠下暫停車得如公死名垂
史自有人情淚滿裾東國成仁鄭達可異時同德李

尚書

郎李邦華

雲麾石墨今安在廟壁荒涼草木踈

世傳唐雲

麾將軍李秀石碑藏于文文山廟今失所在

薊州途中偶吟

鼈山歸路見春天吹面東風軟似綿不有酒杯難遣
惱最憎書帙反招眠驛梅凋落無多雪薊樹微茫摠
是煙家國只祈安信到未愁鬢髮異前年

紀行一首簡呈兩使乞和

道路頻驚節序移卽看楊柳出青枝停車每爲聞殊
俗入寺多因搨古碑卯酒不嫌終日醉午飡兼送過
宵詩桃花洞裏尋真約須及河豚上釣時

榛子店

山如鬟黛水如眉尚憶蘭姬怨別時滿地干戈夫壻
隔不關遮道有楊枝

二月初八日到永平府別咨官來到傳家中安
信兼致沈叅判稗教書扇三詩途中次韻二首
平生強項少低垂最畏蕭園萬首詩此地風煙今獨
往新春楊柳若相思行裝澹澹惟書帙歲月堂堂付
酒卮楸玉輸贏饒罷未真知不着爲高碁
我行多感慨人事又叅差世路難萍合詩思似黍離
春天鴈已盡寒食花漫滋今賴頗瀟灑歸心十二時

文沙河縣

行蓋翩翩古縣隈
成樓煙柳罨還開
朝日龍鱗騰海出
春風馬鬣度遼來
薊北燕南多感慨
斗邊雲下一徘徊
中原賢士知幾在
應有當今濟屯才

桃花洞

昔聞醫巫閭今遊桃花洞
春寒花未發潑墨雲如凍
境淨不可唾飛瀑響拔眾盤盤進微步
往往撥清夢石髓訝許潔雲膚
遮掩映叶一笑舉酒杯銀河久低仰
興酣力俱副欲摸未易狀緬憶賀先輩
避世聊自放商顏杳高踵巢由合同盟
叶心清慮亦消逍遙至

日竟

叶○成化間進士賀欽避世隱居于此

夏日訪性老林亭

烏几癯容舊翰林
休官頗喜卜居深
殘荷雨滴魚吹沫
古壁雲移鶴就陰
不着傍觀能了局
無聲自得勝彈琴
浮名誤我遲歸穎
每想歐公愧夙心

罷官歸又思穎亭

劈蟹佐醪風味閒
歸來管領小溪山
相公此意酬何幣
清餉全勝與好官
時因相奏罷職故云

墳庵酬里中諸君

野翁攜酒至微月
欲生時行輩相尋
少逢場每問衰

秋花心事見風樹昔人悲來此爲歸漸堂扁許自知
秋夕與傲齋仲吉作

此地何嫌近洛城秋晴煙澹稻田平寒花疎柳騷人
意濁酒香蔬野老情乍解官啣非是退偶來林壑暫
逃名山繞清溪溪繞屋幅巾時對問經生

與傲齋坐石上徐君聖彝適至

常惜來遊少今朝俗事除石湍臨洗酌楓樹坐看書
野意籬鳴犢閒心水見魚知君懷舊侶瘦策問幽居
鄉村卽事

病懷聊試水邊樓黃葉因風打不休溪岸鷺飛秋漠

漠石田牛返雨颼颼此身已覺於焉老濁酒一斟那
有愁只是詩逋今未了除他心與境俱幽

送徐慶世觀察關西

富貴猶能寒士如曾中謂是有詩書寸金肯欲留身
後衆瘠今方仰食餘少小追隨年比近江關離別鬢
蕭疎梅同去歲堪相贈蓬勃西風入使車

與國舅金領敦士源沈釋教遊宋洞賞花

三月桃千樹遲看出洞開浮名空自謬今日始能來
偶值山中話逾思穎上回摩挲懷舊輩香漉訝留杯

時用湖堂
銀盃行酒

又拈杜古用聚星堂詩令

肩輿訪幽洞雨過劈岸赤緬懷古遺逸循址求故宅
絃誦會此地杖屨想前陌愧余方羈紲久作紅塵客
莞爾飄碧氈爽如入雲翮心期欣物華談屑溯夙昔
結髮追朱陳流汗比澁籍珍重楓太史登壇便列戟
粲堂筆如椽金閨曾接跡有飲無間阻未言先剖析
騁辯薄吳蒼宴坐至日黑虛明難自把轉覺心囂斤
欲去情未已重握酒以益遙訝林木翳稍稍羣動息
步下月隨身仰看高一尺平生山水興至死難塞責
榮名皆外物暇閒能自適諸公須及健莫待頭盡白

成北青士執輓

少小識公今及衰燕巖梅宕幾追隨慨然嘗有功名
志晚又益工韓柳詞力斥稗官爲已任久居芸館受
君知榮於崇秩惟齋號書送粉旌不作悲

將歸廣陵訪孺良江亭不遇

絕岸柴門迥小車側徑通高秋江漢白落日楓林紅
浩蕩空如此蕭條竟莫逢知君將賦隱不見意還同
歸遁村以病經旬不出

歸晏山中九日過惟應猿鶴故嗔訶偶然寒疾經旬
久爲是涼樓賞月多數樹秋陰交老屋一天踈雨打

衰荷何曾熟客相來往無酒林間獨自歌時村里禁酒故未云

秋夜偶吟

秋風天宇潔高齋值靜夜少焉明月出植杖梧桐下

歸路遇孺良登江亭打話

冰湖何似西湖好綠飲亭扁語還陳鴻鴈數聲驚晚節蒹葭千樹訪伊人身多涉世心逾澹情到忘形話

更真題壁古松期歲暮李君神筆比唐寅壁上有李畫師寅文

畫松○李暉作亭西湖范致能用東坡語名曰綠飲孺良方思亭扁而此亦為陳語故云

泛舟西湖憶子淵

載酒重尋楊柳洲樓前景物四時幽煙橫岸北漁歌

晚木落天南鴈陣秋已道浮名分日直何妨佳句隔年酬適來此地風波少容我閒眠舴艋舟

送趙叅判弘鎮赴燕京

大雪穿過姜女祠夕陽來讀伯夷碑燕南薊北多慷慨公去那無感舊詩

試院與洪叅判黃周洪叅判義浩鄭承旨來百

金叅議愚淳尹大諫益烈趙校理庭和申正言

在植南持平吉寬沈典籍能稷聯句

老夫心事有青天三十三龍自躍淵思片玉誰探崑

崑上五雲先繞日車前淵良材常恐科為累昭代深

知用急賢寧 彬蔚英才平素蓄公明藻識圈朱圓齊 菊
鑑評自有騷壇筆成就終歸造化權石小 黃甲明朝唱
名是朱衣何處點頭先西松 却逢永叔詩相和留與伯
時畫共傳翠 吉士應多吾榜得聖心凝佇禮羅懸澤
文章斯世徒爲爾忠孝何人作褒然衡 愧我傍觀臯
比席一窻星月照孤眠野

入天磨山觀朴淵瀑

石腹土暈崩厓滑肩輿快下如放船縈藤疑若初無
路眼中忽見銀河漩千尺飛流語雖陳到此聊復誦
謫仙雷電砅騰朝日暗長虹如練掛青天奇紋鋪散

冰玉秀明氣別染苔花鮮巖窟留貯逞會水墨潑甌
面起霧煙水能因物以賦形與石相激豈性然細究
物理觀有術桃核黃泥笑太癩何必理屐捫确犖何
必濯纓撓漪漣高爽自得喧動外靜聽莫試蛟龍淵
我將買田歸潁尾辭榮清風慕昔賢安得鵝溪千疋
絹貌取秋濤掛案前

小豐樂亭次歐陽公韻

簾外青山遠遠斜乳鷗浮水淨無涯主人已自悲華
髮好事辛勤手植一作種花

李君受

魯益

將還楊峽故林敘別書贈

去去終南遠孤舟上瀨遲衰懷當別話不獨爲秋悲

著庵俞公

漢雋

輓二首

求得文章意氣中瑰奇寧復有如公平生師我先君子坡老如思六一翁

自著千篇誰敢刪老來文膽大於山低首幾年爲郡縣緋衣聊復貳秋官

與李新老

在秀

子淵小酌梅下

將相門中李與桃競春妬粉恥同曹窮陰天地微陽動大雪山林一士高已識乾籜來饋食惜將嘉卉漏離騷夜寒皴玉溫誰倩索笑情懷醉濁醪

食櫻桃二首

贈滿筠籠萬顆丹圓疑龍頷數回看今朝不飲還成醉更憶垂垂琥珀寒

橘柚嫌厚荔支皴恰似醜醜氣味真赤玉盤中誰辨色記曾霑 賜不才身

西池與新老性老君受子淵會飲李元汝

義甲

亦至賦得蓮花一首

錦筵賭妓笑王郎萬葉千花自短長把酒較看名士醉倚風還似美人粧沾泥新燕緣牽愛响沫游魚慣洩香終識衰殘如老我多時聽雨坐池塘

送朴叅判

宗正

赴燕

萬里長程木葉紛紛華蓋遠相分
荒城鶴返遼陽月古戍鴻嘶碣石雲
歲暮殊方頻送客梅開故國正思君
祇今不復談兵事此去休求俠士羣

簡李學士君受鄉居

何必殊高逸縻官亦不來
上游春雨足寒食野花開
石壁行題句松林坐把杯
每懷心自愜非獨歎賢才
暮春以奉審 本宮至駱山下記余與元履自
少小家城東遇花柳時節頻來遊此地今忽三十
光陰矣元履又作宰清風昨纔別去感賦一

篇以寄之

駱山東南杏花樹長慶橋畔夾煙霧
士女歌笑漲春雲日出嬉游至日暮
今我來斯歲幾換柳禿梅死驚風雨
燕鶯依稀沽酒肆樓臺指點停車路
就中有人李元履白眼疎髯美無度
煙花幾度騎馬至別後光陰事錯互
雨作泥兮風作塵花前掉臂人來去
舉杯悵望何所思元履詩人亦畫史
名宦又住四郡間竟日簿牒清案几
村子問字松徑掃寺僧分餐野棹艤
世路蕭疎又失君天下誰是佳公子
雲樹迢迢恨無從湖水截斷三百里
詩筒寄傳估客船錦屏山色青

未已

四月二十三日爲檢漕船出江倉歸路與景好

吳士默

淵常

南公勵

履翼

遊湖上拈韻共賦

西湖十里上高樓宦意何曾似惡流坐喜倉曹聊遠
郭行逢風浪便迴舟斜翻卷幕看低燕靜聽鳴榔有
狎鷗楊柳條條皆可賦百篇留作月中遊

舟訪景好江榭邀公勵同飲

此似西子湖水光淨如練舟泊柳陰處不知誰所遣
又值銀臺客三人成好宴菱塘回吏人倉厨移酒膳
遞飲酌鸚螺墨海凹古研戴筆掛素壁勁適比銀線

互忘身縻世放言無所揀卽此清真會何必高隱美
夕陽抱雲歸潏澱隨帆片乍閒元不意拈毫寫情戀

內閣校正

先朝御集文諸僚韻

聚珍編 聖製經夏又秋涼夙歲承殊渥多時近耿
光疲癯當此役咳唾有餘香校對如塵掃羣僚慎勿
忙

楓臯晬辰文諸閣僚志喜韻以壽之二首

忠孝文章有自來當今宜仗濟時才得如公壽知何
辱笑倚兒孫進百杯

國舅衣冠職又清授經爭道似桓榮如思獨善非初

志宜致吾君及庶氓

新老將赴耽羅察理之任與性老君受李子田

龍秀

設酌梅下以餞梅兼送君分韻余得餞字

起君金門王堂選送君千里滄海縣侑以竹枝巴渝
歌設以葡萄清麴宴此去耽羅知幾聞千盤一葉行
宛轉凍雲如墨梅慘愴聞者鬼悸送者唁君言丈夫
仗穹昊殃咎宜無神鬼譴我舟如龍復如虎鼉鼉蛟
鰐避不見况復遐土宣德化誅頑赦迷梗俗變不但
覆舟無伯夷王靈負戴天所眷幾微不見閒整芴
慎旃何須更書扇我聞其言而壯之險道益驗剛腸

鍊膽氣直欲高漢挈大瀛看來如小淀于今緩急誰
可恃亦知廟剡無遺薦輕身勇往由素學他日應不
富貴戀利涉大川斯可占重開歡顏好飲餞

李畫師寅文山水戲墨

李生貌癯心亦奇巾笠弊落不遇時雙眸炯炯老不
枯畫不人師造化師雲煙山水填胸臆沒骨鋪置知
者誰前年爲我寫山居知我曾有歸潁思南嶂北岸
樵歌動重洲復渚漁舟移玄雲抱石繞竹屋蒼崖夾
水注墨池數樹梨花不盡零水田上下飛黃鸝復有
偃松覆礪坑歲寒盡成虬龍枝流水之邊清何極玄

圃丹邱合採芝應有高士在巖穴墨瀋淋漓求不知
五湖三山如天上寤寐長誦前人詩我今攢蹙尺幅
裏堂上高掛傾一卮與君相識二十載傲骨亢爽能
自持市井俗子等蟲沙得絹沽酒不復疑一去海門
無尺書尤愛妙法難手追簿牒縛身應不耐從前畫
法能無衰朝看似見雲空濛暮對疑臨水漣漪韻人
適意在筆墨君乎歸來其莫遲

金陵集卷之四

